



00690

毛尚書奏稿

卷之十二目錄

官軍攻勦三山賊巢生擒首逆摺

派員巡緝洋盜片

追勦陽春客匪獲勝摺

欽奉 寄諭密陳擬辦情形摺

官軍追勦陽春縣客匪生擒首逆摺

留張運蘭在粵防勦各匪片

頒賜福字謝 恩摺

飭知府吳贊誠等辦理沿邊團練片

奏稿卷十二目錄

擒獲菱角塘首逆北江一路肅清摺

遵 旨飭張運蘭拔營赴閩摺

請優卹總兵文恆久片

陸續拏獲洋面盜匪片

瀝陳度支艱窘請緩解協撥各餉摺



官軍攻勦三山賊巢生擒首逆

順治三年正月
十七日

奏爲官軍攻勦三山賊匪老巢生擒首逆現在搜捕餘匪以期淨絕根株恭摺由驛馳

奏仰祈

聖鑒事竊廣東英德縣屬巨匪鄧二尺七等前乘石逆

餘黨竄擾粵境糾衆竊發經臣檄飭統帶楚勇福建臬

司張運蘭移軍勦辦上年十二月初間攻破該匪三山

外巢大獲勝仗於十二月二十四日由驛

奏報在案該匪鄧二尺七因被擊敗踞守英德縣屬之

鶴嘴山中依山築壘樹立木城深挖濠溝密排槍礮山

奏稿卷十二

一

前左右兩村皆傍山麓相爲犄角後路復有村莊數處

互爲聲援形勢甚爲險固張運蘭調齊五隊楚勇亦依

山聯絡爲營並令署英德縣馮寶封署陽山縣王錫誥

各帶隊勇分守東路之水浸洞西路之金雞坪以防奔

竄十二月十三日黎明率領全隊分三道進兵總兵文

恆久副將賀國楨由右路前進總兵易榮華葉明瑞等

由左路前進該司自領中軍督同遊擊譚發律等繞出

鶴嘴山後同時夾攻該匪率衆分投拒敵均被我軍擊

敗生擒頭目孔二十等陣斬及滾崖落澗死者共約千

餘人當將樓井大徑涌等處賊巢村落平燬我軍亦有

傷亡嗣是連日雨水不能進兵二十一日晴霽張運蘭復率各隊徑進先將附近山麓之左右兩村攻破向逆巢連撲數次俱爲槍礮所阻環攻三時之久賊巢內滾石礮火紛紛雨下遊擊易永茂越濠拔柵斬守柵之賊數人被礮子飛擊殞命把總劉明輝勇目鍾承天亦中槍陣亡總兵文恆久被礮傷肩該匪抵死拒守張運蘭親督大隊斬馘悍賊百餘人鏖戰至夜方始收隊回營張運蘭察看該山前面險峻難以仰攻惟山後路徑陂陀稍易進攻隨於二十三四兩日派令各隊更番疊戰先將山後賊村數處攻破卽於山閒開挖地道搬運大礮逼近鄧逆老巢二十五夜厲兵秣馬預備火器於五更後帶領各隊直撲該逆堅巢越濠而進匪黨猝不及防被我軍噴筒火彈射入柵內登時火起山中樹木叢雜四面皆然延及賊巢火光燭天我軍乘勢圍攻賊匪冒煙突火四路逃奔多被截殺餘皆翻山越嶺潛遁比及天曙賊巢已空查看燒死之賊約五六百人殺斃者亦數百人擒獲鄧亞喜李觀春等二十餘名逆首鄧二尺七率領悍賊百餘人奔往菱角塘之盧家村該處距三山鶴嘴約四十里素與鄧逆勾結我軍探悉情形卽於二十六夜星馳前往將盧村圍住盡銳急攻隨將村

外賊壘攻破殲戮多名盧村之賊知勢難抵禦遂與鄧逆及其親黨數百人翻山宵遁潛匿菱角塘後一帶山洞二十七日我軍追躡至彼查看該處皆係深山窮谷險峻異常鄧二尺七等在蔣家山洞負嵎不下並於洞外隘口安置擡槍木石以圖抗拒張運蘭覓得鄉民馮聲鑾馮上秀等令作鄉導訪悉該處山洞屈曲通行約長數里遂分兵於洞後出路堵截仍於前面逼攻我軍鼓噪登山總兵易榮華副將賀國楨奮勇先登軍士梯山越澗而前軍功葉光先中礮陣亡各哨隊憤恨之餘勇氣百倍悉力拒戰殺賊數十人至暮該匪退入洞內

奏稿卷十一

三

我軍圍守達旦次早張運蘭令各勇多備柴薪火具填塞洞口諸處舉火焚燒該匪被煙熏火灼而死者不計其數鄧二尺七攜其幼子鄧亞保及死黨鄧亞鳳等由洞後竄出伏兵齊起一併兜擒並據英德陽山二縣各擒獲逃賊鄧亞盤鄧亞通等數十名又賊目鄧亞廣一名經署陽山縣王錫誥督同團練格殺總計先後殲擒各匪畧盡此外尚有零星餘匪皆已遠颺張運蘭隨將生擒各犯於軍前正法首要各犯委員解省稟報前來

臣查連陽一帶界連數省峻嶺危灘萬重險阻從前屢爲匪徒嘯聚多歷年所前撫臣耆齡攻勦藍山案內鄧

二尺七曾經投誠給與頂戴而恃險負固蓄逆愈堅環山數十村匪類推爲渠魁以劫掠爲生積年設兵駐防因山勢險阻未能深入勦洗去冬李復猷股匪竄突連陽一帶鄧二尺七乘勢僨起初猶以爲劫盜之雄可以掩而捕之及派兵進勦其巢穴險固巖洞幽深所有山內村莊及各要隘之區皆堅築牆壘藏伏槍礮層層周密大礮火藥穀米豬牛之屬逐村屯積其蓄謀之久搶掠之多亦可想見張運蘭以得勝之師乘勢急擣縋幽鑿險盡力圍攻受傷將士至三百餘人僅而能克此皆仰賴

奏稿卷十二

四

聖主天威無遠弗屆遂使元惡授首逋寇蕩平不致蔓延爲害臣現已飭提該首逆鄧二尺七賊目鄧亞鳳來省督同司道審明卽行正法以彰

國憲而快人心鄧二尺七之子鄧亞保及鄧亞鳳之子鄧亞生均年未及歲飭司審明照例緣坐另行咨部辦理臣仍飭張運蘭率領所部弁勇周歷各處實力搜捕務將在逃餘匪悉數殲擒一面督同地方文武將善後事宜妥爲籌畫辦理毋令匪徒再有潛聚勾結以期斷絕根株一勞永逸福建臬司張運蘭經臣檄調來粵先後勦辦李復猷鄧二尺七兩股巨匪親督各隊兵勇於

深山窮谷中轉鬪而前躬冒矢石不避艱險疊次出奇制勝陷陣摧堅遂使積年逋寇一旦蕩平實屬勇畧過人功績卓著該司職分較崇應如何獎勵之處臣等未敢擅擬伏候

皇上天恩給與獎敘以資鼓舞出自逾格

鴻施各將弁千里從征衝鋒冒鏑亦俱著有微勞記名總兵文恆久葉明瑞易榮華劉光明均請

賞加提督銜副將賀國楨譚邦連均請以總兵記名

簡放遊擊譚發律請以參將陞用其餘在事出力員弁兵勇容臣擇尤另行奏懇

恩施以示鼓勵此次陣亡之參將銜兩江補用遊擊易永茂把總劉明輝及前次陣亡之守備熊萬隆仰懇天恩先行交部議卹其餘傷亡弁兵勇練人等彙冊咨部分別卹賞臣謹會同署廣東巡撫臣郭嵩燾合詞由驛馳陳伏乞

皇太后

皇上聖鑒訓示謹

奏

派員巡緝洋盜片

同治三年正月十七日

再粵東負山面海壤地遼濶陸梁之徒較之他省尤爲桀黠自咸豐以來狂寇狡起隨撲隨滅十餘年未嘗止息近者高州軍務雖已戡事陽山英德各匪亦已蕩平而客匪屯聚陽春縣屬之金堡企坳一帶勾結髮賊其衆至數萬人屢經檄調各路官軍勦辦一時猶未能得手海外則高瀾洋面素爲逋逃淵藪盜匪嘯聚有年航海商民時遭劫掠該處港汊紛歧島嶼林立非厚集兵力不能聚而殲旃而各營師船多因年久破壞未修遇有出洋捕盜皆須添雇海船充用上年經署督臣晏端

奏稿卷十二

六

書會同水師提

臣

溫賢嚴飭巡洋將弁合力查拏先後

拏獲洋盜陳亞幅等多名

奏辦盜風總未盡戢高瀾一帶洋面仍時有搶劫之事

臣現咨商水師提

臣

選派幹練將弁督率巡洋舟師添

雇挖船前往圍捕並責成該管地方文武設法嚴拏又

東莞縣屬之板頭村新安縣屬之岡邊村近有匪徒私

造長龍艇動輒數十號出洋滋擾臣已派委前任潮州

府知府海廷琛等會同水師遊擊黃廷彪等前往查辦

已起獲長龍匪艇十餘隻惟各犯尚多在逃未獲現飭

購綫督兵嚴行躡緝務期悉數擒獲解辦以靖海洋臣

謹會同署廣東巡撫臣郭嵩燾廣東水師提督臣溫賢
附片陳明伏乞

聖鑒謹

奏

奏稿卷十一

七

追勦陽春客匪獲勝摺

同治三年正月二十八日

奏爲官軍追勦陽春客匪連戰大捷恭摺由驛馳陳仰
祈

聖鑒事竊粵東客匪屯聚肇慶府陽春縣屬之金堡企
勘一帶旬結髮賊四出滋擾逼近陽春縣城先經守備
侯勉忠等堵勦獲勝因賊勢甚衆未能剋日殲除臣等
飛調署羅定協副將卓興由高州拔營赴援前經

奏明辦理在案該匪疊次撲犯陽春縣城均經守備侯
勉忠會同地方文武官紳奮勇擊退先後將黃泥夾白
木橋十二排坡潭水等處村莊收復嗣據署羅定協副

奏稿卷十二

八

將卓興稟報由高郡移駐陽江縣屬之織篋地方復進
紮雙捷墟河旁正月初四日該匪率領大股突往撲營
漫山徧野由河東西分兩路擁至勢極洶涌卓興分部
隊伍嚴陣以待欲俟其半渡擊之並於陸路分兵互相
援應外委陳仕不遵號令先自帶勇渡河千總黃崇光
止之不及亦相率競渡爲匪所乘不能抵禦遂致敗潰
外委周忠海力戰捐軀並陣亡壯勇十九名千總許加
晉身受重傷此外尙有被傷隊勇多名千總黃崇光隨
督所部奮勇扼要堵截方得收隊卓興憤怒亟分兵兩
隊往河西一路迎戰自率大隊由河東繼進吶喊而前

所向披靡該匪抵敵不住大敗奔逃我軍四面包鈔殲斃無算其渡河溺死者以千計追殺至二十里外屍橫徧野斬取首級二百顆內有偽營官二名搜出偽印二顆生擒十一名奪獲旗幟礮械馬匹多件卓興因外委陳仕不遵號令輕進取敗卽按軍法立斬以徇干總黃崇光雖亦違令擅進而能轉敗爲功尙有可原將該弁棍責摘頂以觀後效是日都司蔣朝剛督勇在金鉅嶺一帶堵截陣斬賊目一名生擒二名追至樟木灣沿途斬戮及落水淹斃者甚多割取首級五顆耳記二隻並獲器械多件初六日該匪復分股由雙捷河西前來挑

戰另有悍賊數百人突近雙捷墟口卓興出隊擊之追殺數里慮有設伏收隊而回該匪竄至地豆岡復被都司蔣朝剛截殺生擒賊目二名殲賊甚夥初七日匪首戴梓潰等親率大股圍至卓興分兵五路兜勦該匪面面受敵力不能支被我軍陣斬多名大敗奔北自相踐踏死者無數追至那旦地方將賊巢三座悉行攻破巢內輜重舉火焚燬救出龍溪寨被困民萬餘口割取匪首二十七顆奪獲旗幟礮械等件卓興隨以半軍留守雙捷自領餘隊馳赴麻汕以遏賊匪竄撲陽江縣城之路適聞該匪攻撲遊擊雷秉剛都司蔣朝剛所紮牛

場沙中橋各營礮聲不絕相持甚急卓興卽由麻汕出
其後鈔擊該匪不虞此軍猝至不敢拒敵紛紛退竄雷
秉剛等亦帶隊協勦初八九兩日連戰大捷殺賊數百
名乘勝直追至塘角墟等處將該處匪巢攻燬斬獲匪
首一百一顆生擒四名奪獲大旗擡槍等件外委莊富
發奮勇當先手刃騎馬賊目二名割取首級旋中伏礮
陣亡受傷壯勇十八名該匪連次挫衄勢已窮蹙奔回
雞籠門金堡企塹等處卓興於初十日帶隊進抵陽春
縣屬古良水口等情據各將備稟報前來臣等伏查客
匪勾結髮賊屯聚陽春據險負隅歷時已久自信宜克

奏稿卷十二

十一

復後高州各處敗匪復以該處爲逋逃藪是以愈集愈
衆臣等前調卓興一軍專辦此股客匪以口糧欠放甚
鉅遷延多日至去年十一月內始能移營陽春縣屬之
織箕其時陽春告急匪勢方盛卓興按兵觀變伺隙而
動乘初四日一戰之威節次掃蕩使賊勢不至猖獗該
副將行軍素有紀律每次接仗謀勇兼資出之以鎮定
收斬不遵軍令之外委陳仕尤爲近時將兵者所難及
現在勦辦陽春陽江客匪事宜應卽責成該副將一手
經理其駐防陽江之都司蔣朝剛一軍駐防陽春之守
備侯勉忠一軍應併歸該副將節制調遣以一事權俟

勦辦畧有頭緒將戴梓潰李四白面豬各匪搜除淨盡
再行察看情形遵照前

旨將各老弱良善之客民妥爲撫綏庶幾一勞永逸用
以仰慰

宸廑此次陣亡之潮州鎮左營外委五品藍翎周忠海
潮州鎮中營外委藍翎儘先千總莊富發臨陣捐軀殊
堪憫惻懇請

敕部從優議卹以慰忠魂其餘傷亡弁兵壯勇容俟確
查另行彙案咨部核辦所有勦辦陽春客匪疊獲大勝

情形臣謹會同署廣東巡撫臣郭嵩燾合詞恭摺馳陳

奏稿卷十二

十一

伏乞

皇太后

皇上聖鑒訓示謹

奏

欽奉

寄諭密陳擬辦情形摺

同治三年正月二十八日

奏爲欽奉

寄諭謹將前後擬辦情形縷晰密陳仰祈

聖鑒事竊

臣

等於本年正月十四日承准議政王軍機

大臣字寄同治二年十二月十四日奉

上諭羅惇衍奏劣紳勾通外國勒還巨款請收回印票以杜後患一摺據稱已故布政使銜候選道伍崇曜捐輸銀三十二萬兩諉與咪國要在粵海關索本息銀四十七萬餘兩今該紳已於十月二十四日病歿恐海關原給印票一落於咪夷之手則持券來索又費唇舌且

奏稿卷十二

七

釀事端請令兩廣總督察看委辦等語廣東紳士伍崇曜前代籌銀三十二萬兩據云借自咪國並需息銀十五萬兩前經晏端書奏請由粵海關稅項下陸續給還當經總理各國事務衙門戶部議由廣東現任督撫飭令伍崇曜先行倡捐並於通省商富內勸令一體捐輸歸款業經有旨允准茲據該尚書奏伍崇曜身故恐海關印票一落外國之手諸費唇舌所籌不爲無見此項銀兩無論借自何人總以速行歸款爲妥著毛鴻賓郭嵩燾毓清查前項銀兩曾否勸捐歸補陸續歸還現在尙欠若干能否令伍崇曜子弟自行籌補若干其不敷

者官爲勸捐清結惟海關印票總以先行收回爲最要之著免致咪國執持原券致多饒舌該督等務使妥速籌商豫弭後患是爲至要欽此仰見

聖主於思患豫防之中寓寬大不苛之意準情察事仁至義盡_臣等遵查故紳伍崇曜號稱巨富咸豐八年前

督_臣黃宗漢勸派捐輸託稱籌借銀三十二萬兩約明六釐行息半年爲期指在海關稅項下撥給抵還給與海關印票分交各借戶收執其時並未有借自咪夷之說迨同治元年十一月始據咪國領事裨理以該國旗昌行出名申陳追討經前署督_臣晏端書奏明自同治

奏稿卷十一

三

二年八月起按月由海關扣還以未奉准部文尙未起扣_臣等蒞任之初體察情形知爲該紳託辭卽經據事指斥以中國借貸洋商銀兩約期歸還不能稍踰時刻豈有約期半歲而遲至六年尙能支展之理且黃宗漢借之伍氏祇知其爲伍氏資財伍崇曜轉借之洋商並未據將洋商聲說是洋商僅能索之於伍氏伍氏始可索之於官此項卽果出自咪國亦斷無不由中人徑向官索討之理所以自同治元年申陳一次以後至今並未續催其從前之爲伍氏指使者已無疑義至當時伍崇曜託爲借貸不過藉以求償黃宗漢意在勒捐原不

更思歸款黃宗漢自收貸捐之利伍崇曜自避報捐之名各有隱情不肯明說卽使黃宗漢尙在廣東亦必不能籌款歸還何況事隔數任時逾數稔又當艱難竭蹶之時伍氏家資雖不及從前較之官庫猶爲充裕自應仍由該紳設法清理適會該紳病故伍氏子弟無曉事者以致延擱嗣奉准戶部議駁卽飭廣州府李福泰諭知伍氏令以伍崇曜遺言報捐上紓

朝廷之隱慮下順本省之人情必當爲之奏懇

恩施從優獎敘一時亦尙未能定議茲敬繹

諭旨有礙難宣示者數端不敢不爲

奏稿卷十二

十四

皇上陳之伍崇曜託名味商僅據該領事申陳旣經奏請按限扣還因部文駁斥亦並未索追臣等所據爲辭者印票交伍氏收存伍氏應別有借據交之味商若假外人挾制應卽奏參儻明示以一落外人之手諸費唇舌旣寬伍氏挾制之罪又資外夷以口實使有所據以行其恫喝印票在伍氏不能處理清晰必不肯退出印票若在洋商不能全數歸還豈肯先行呈繳與其鞫轉而設法收回不如直截而正詞拒絕且與外夷交接惟當據理以示之限制不當過慮以啟其猜嫌臣等所謂礙難宣示者一也廣東艱窘情形官紳同關休戚臣等

每告諭伍氏直謂已出之財萬無索還之理一家收其利而使一省承其累伍氏尙爲巨富亦何忍獨享無論庫款豐歉概不能籌還乃欽奉

寄諭無論借自何人總以速行歸款爲妥伍氏若據

詔旨爲言臣等亦無從置辯是前之索還尙出於情求

今之索還且將以勢壓臣等所謂礙難宣示者二也此

項銀兩經戶部議飭捐輸歸款羅惇衍原奏亦稱向粵東捐助歸款將由官爲勸捐旣難以措詞將由伍氏私行勸捐更無此辦法廣東歷年辦理捐輸民力凋耗各州縣借捐款爲辭正項錢糧報解益形短絀臣等以軍

奏稿卷十一

五

餉緊急前督撫臣定有派捐章程恐其苛擾平民改爲

按照富戶酌量勸捐平民之氣爲之稍紓而在事譟謗之言反爲之加甚爲地方籌辦軍餉已多行其阻難爲伍氏籌還借款必更滋其抗拒旣曉以勸捐歸補之說必且多方要求期遂所欲臣等所謂礙難宣示者三也再四思維方擬由臣等敬謹節錄

上諭宣示責成乃於正月二十二日接准戶部行知旣經鈔發則中外宣播必不能揜人耳目若據臣等節錄之

上諭與鈔發之文比較必更有所藉口當卽商之海關

監督臣毓清暫將部文收藏內署先據羅惇衍原奏飭知伍氏令其趕速清理如果實屬借之咪商伍崇曜家屬力難全償亦必俟至情勢兩窮之日再行展限由官幫同料理斷不可先事惶惑使伍氏反得置身事外坐待地方官之區畫經營以收其已去之利應懇

皇上天恩俯准依照臣等此奏另頒

諭旨責成伍氏自爲清理期使洋人不得生其猜疑伍氏不得行其挾制而臣等亦有餘地以與之辨論開導不勝惶悚待

命之至是否有當謹會同署廣東巡撫臣郭嵩燾粵海

奏稿卷十二

六

關監督臣毓清合詞恭摺附驛密陳伏乞

皇太后

皇上聖鑒訓示謹

奏

官軍追勦陽春縣客匪生擒首逆摺

同治三年三月初七日

奏爲官軍追勦客匪髮賊疊獲全勝生擒賊首餘匪竄散現飭委員察看情形分別辦理恭摺由驛馳陳仰祈聖鑒事竊粵東客匪句結髮賊屯聚陽春縣屬之金堡企勒等處正月初旬署羅定協副將卓興等各軍進勦連戰大捷經臣於正月二十八日會摺

奏報在案卓興自移紮陽春縣屬古良水口之後探悉該匪分竄陽江縣屬那旦地方隨督率所部跟蹤追躡正月十三日卓興會商署陽江縣徐寶符與都司蔣朝剛等及紳士前任山東青州府譚伯筠帶領兵勇由河

奏稿卷十二

七

邊右路進攻該副將分撥隊勇由龍溪堡左路夾擊自率大隊居中調度匪衆左右衝突被我軍層層包裹陣斬五百餘名割取首級十顆奪獲旗幟等件正酣戰間風雨交作槍礮難施該匪乘閒免脫次日午後復大股蜂擁而來卓興會合陽江官軍暨署陽春縣吳璇在籍刑部候補主事劉承輦等各練勇奮力迎擊該匪見我軍勢猛不敢拒敵翻山越嶺逃回金堡等處老巢嗣是連日大雨不能進兵至望後稍霽卓興隨與春江二縣官紳馳往雞籠門相機進勦賊匪於金堡企勒雞籠門一帶內踞瓦屋外搭篷寮數十里內碁布星羅填滿山

谷十七夜卓興遣人潛往金堡用火箭射入賊巢登時火發匪衆不及堤防踉蹌撲救並分黨拒敵被我軍擊殺多名十九夜復往雞籠門如前縱火並預撥各隊分向金堡企塹水陸夾攻首尾相應該匪夤夜慌亂被我軍破柵直入譁然驚潰自相踐踏斬馘甚多金堡企塹兩處隊勇亦各乘勝進攻該匪膽落心寒不能復成隊伍四散奔突且戰且走各匪巢同時火起到處皆然我軍勇氣百倍直至天曉所殺不可勝計當將雞籠門金堡企塹收復賊匪遂由潭水坡仔一帶奔竄卓興亦進紮潭水因天雨連綿路塗泥淖休息士卒二月初五日

奏稿卷十二

七

匪黨漫山徧野前來撲營卓興與各練勇分作三路禦之該匪布陣拒敵先與中路接仗賊目數人手執大旗率隊向前勢甚凶猛我軍施放槍礮無不應聲而倒餘衆披靡大敗奔逃其左右兩隊亦同時敗潰被我軍合圍包鈔殲斃不下千人追殺二十餘里至白馬徑一路屍橫徧野我軍直趕渡河始行收隊計斬獲首級二百餘顆生擒十名奪獲大旗擡槍洋槍多件匪黨有分竄鳳南白馬新墟者又被守備侯勉忠等沿途追殺多名該匪隨在陽江三甲雙窖等處山險屯聚初七日卓興由潭水進攻三甲至荆山徑口該匪一路密釘竹籤以

阻官軍進攻之路卓興揮軍拔釘前進直至三甲雞頭塘與該匪柵壘相近卓興督率各軍鼓勇而進槍礮齊施該匪紛紛四散登將三甲墟收復餘匪向新樓西岸山坪竄去復經侯勉忠由龐垌小路繞道截擊生擒僞先鋒馮新養等五名初八九等日復連攻新樓西岸各處匪巢陣斬僞師尉黃煥新一名將賊巢悉行焚燬該匪由黃潼河一路竄往東安縣屬之風洞長沙及信宜縣屬之分水錢排等處卓興訪聞匪首曾白面豬潛匿陽春縣屬之上村親督大隊前往圍捕卽將該首逆擒獲一面解省審辦一面分兵追捕餘匪等情據卓興及

奏稿卷十二

十九

各營縣稟報前來臣等查客匪盤踞陽春縣屬之金堡企塲時閱數年根深蒂固又復勾結髮逆擾害地方攻撲城池其勢已成燎原現經卓興會合侯勉忠蔣朝剛等軍及陽江陽春二縣練勇疊次攻勦獲勝焚燬老巢擒獲匪首曾白面豬足以少示懲創但臣等初意擬於痛勦之後卽將各路土匪分別搜剔鋤其頑梗以爲設法安插地步乃該匪復因被勦窮蹙分竄信宜東安所屬各地查信宜久爲賊擾民生凋殘元氣本難驟復且與西省容岑各縣相距非遙其間新撫之衆觀望徘徊心懷疑懼一二不逞之徒亦復時相煽誘雖經屢飭地

方官並加派道員會同設法鎮撫而清還占產解釋積
仇一切尙費周章設使此次客匪相與句串聯合恐又
成屯踞蔓延之勢臣等疊咨廣西撫臣並分飭東西連
界各文武一體堵截搜捕復札飭侯勉忠等軍繞出信
宜迎頭截擊現據稟報該匪因不得西竄又折回東安
之富霖洞新甯之天堂墟爲苟延殘喘之計當檄飭卓
興一軍駐劄陽春以防回竄仍令相機進剿懾以兵威
一面派委候補知府史樸攜帶告示馳往剴切曉諭乘
其流離顛沛創鉅痛深之餘易於感動期使服罪畏威
如將土匪戴梓潰等捆送大營卽當會同地方官將現
在丁口開造清冊體察各該縣情形設法安置庶幾一
勞永逸以奠民命而廣

皇仁除俟辦理能否確有把握再行馳報外所有勦辦
陽春陽江出力各員弁紳勇人等著有微勞可否容臣
等擇尤酌保以示鼓勵出自

天恩先後傷亡各兵勇飭行確查彙案咨部賞卹是否
有當臣謹會同署廣東巡撫臣郭嵩燾合詞恭摺馳陳

伏乞

皇太后

皇上聖鑒訓示謹

奏

留張運蘭在粵防勦各匪片

同治三年三月初七日

再臣節據探報金陵逆賊僞侍王李世賢分大股上竄其前隊廣東花旗股匪已由浙境繞越江西之廣豐玉山漸及撫州建昌地界擒獲賊探供稱該逆有回竄粵東之意臣查咸豐六年廣東紅匪大股竄擾吉安袁臨數十萬人會石逆達開至臨江句降其衆另編花旗股匪本在廣東肆擾多年之衆其黨羽散歸者亦數萬人時虞蠢動前聞侍輔諸逆有由福建江西回竄廣東之說臣等度該逆乘閒上竄爲浙蘇皖三軍日加逼臨其勢已極窮蹙糧道亦漸憂斷絕分股肆擾出險求生亦

奏稿卷十二

三

足掣動官軍進規杭湖之勢以大勢論之江楚當防其竄擾未必遽及廣東及聞侍逆大隊爲浙師所截獨花旗及沛逆一股裹糧疾馳先期竄入江境是此股賊匪本無定向又非若侍輔諸逆與金陵有相維繫之心其回竄廣東句結黨羽以圖一逞亦情勢所應有粵東伏莽徧地皆是前此李復猷一犯邊界卽有鄧二尺七起而應之一經句結必至蔓延尤不可不早爲之備現在兵勇惟卓興一軍屢立戰功而至今尙爲客匪所牽難於撥調其足備堵勦之用者僅有張運蘭所部之湘勇三千人臣等現已檄飭張運蘭移紮南雄州探明賊蹤

緩急情形相機辦理兼顧韶南一帶邊防如賊已占踞城邑則當越境助剿以期聚殲此股不使滋蔓若第伺閒狂奔勢成流寇則且穩守門戶以免歧出之虞而蹈尾追之失惟張運蘭一軍勦辦三山鶴嘴後陽山英德翁源乳源各縣紛紛稟請撥兵搜查積匪張運蘭移紮青蓮墟安立老營自率三旗馳抵英德之石街專辦馮九指一股其菱角塘蔣家洞墩口鄉各處伏匪方謀次第勦辦一經調赴南雄恐各匪乘勢嘯聚反至滋生事端復飭四川候補知府劉德謙管帶信字營移紮樂昌以資鎮壓仍飭添募楚勇三千人期與張運蘭一軍相

奏稿卷十二

三

爲犄角以厚其勢亦可分撥搜勦各處伏匪其嘉應州一路毘連福建江西兩省道路分歧擬飭署三江口協副將方耀挑選所部潮勇三千名駐紮鎮平兼顧平遠大埔邊防其餘不甚得力者卽飭遣散回籍以節糜費正在籌畫聞接准浙閩總督臣左宗棠來咨飭令張運蘭挑選所部二三千人馳赴福建臬司臣本任臣查福建屢經賊擾終不得一逞其山嶺重疊俗悍民貧野無所掠賊亦不願屯踞卽據左宗棠來咨稱獲賊探均有回竄粵東之語閩境卽被賊擾亦不過藉境以趨廣東無及此時舍粵趨閩之理福建當先調集諸軍截其入境

之路亦不宜遠待此軍取道江西又成跟蹤追擊之勢
左宗棠謂臣因高州蕞事檄止張運蘭一軍自尙未悉

臣前後辦理情形竊計江西與皖浙毘連軍事緩急聲
氣猶足以相通廣東現存各軍均未經當大敵誠恐該
逆闖入邊境江皖各軍勢不足以相及是以張運蘭一
軍此時萬不可輕離粵境如探明撫建一帶縣城或爲
該逆屯踞抗拒官兵可以會圍環攻杜其回竄一舉蕩
平仍當飭令張運蘭酌量會勦顧全大局亦斷不敢私
此一軍以專爲自顧之計是否有當謹會同署廣東巡

撫臣郭嵩燾附片馳陳伏乞

奏稿卷十二

三

皇太后

皇上聖鑒謹

奏

頒賜福字謝

恩摺

同治三年三月十二日

奏爲恭謝

天恩事同治三年二月十三日摺弁回粵捧到

恩賞

御書福字一方謹卽恭設香案望

闕叩頭祇領伏念

臣

質比樗輕材同鴛劣忝司嶺海未

報涓埃際茲序轉寅清復荷

恩隆申賚仰

堯文之廣被瞻

羲畫之初開欽惟

皇上苒祿川增

奏稿卷十一

三

繁釐雲集奉

璇闈而燕喜

介福先於

兩宮煥

黼座之

龍光

禔福周乎萬國以

臣

薄植亦濫

殊榮惟有首抃山高

顏瞻日近勤思綏靖推

景福於兩粵東西敬體

柔懷布

多福於重洋內外用佐

皇仁之敷錫藉希

天寵之長邀所有微臣欽感榮幸下忱理合恭摺專弁

叩謝

天恩伏乞

皇太后

皇上聖鑒謹

奏

奏稿卷十二

五

飭知府吳贊誠等辦理沿邊團練片

同治三年三月二十九日

再花旗股匪林正揚由廣德州竄擾江西兼及閩境探聞汀州之甯化甯都之石城皆有賊蹤廣東此時邊防以嘉應州爲最急業經檄調鎮將分別設防復思現在江浙各府縣漸次肅清賊計無復之勢必於廣東并力一逞而此股賊匪又皆籍隸惠潮嘉應者居多情形熟悉親故猶存在在可以句結其大患不僅在外寇之闖入而在內匪之潛藏咸豐四年紅匪之亂三十餘縣姦民一時蠶起其時庫款充盈軍餉易於籌措賴以戡定嗣後搜捕餘匪附省各縣辦理至數萬人之多而惠潮

奏稿卷十二

三

嘉各屬終以兵力不逮未能懲辦各處匪鄉建造礮樓圍牆村村相望恃強爭勝習爲故常現方清釐吏治設法消弭尙可不至無端蠢動若驟有外匪窺伺則內地伏匪乘機響應勢所必然又當此山窮水盡羅掘四空之時必至瞻顧旁皇智勇俱困再四籌畫莫如先事預防因飭虎門同知候補知府吳贊誠會同紳士廣西候補知府張其翰前福建沙縣知縣楊元勳等辦理沿邊團練查嘉應一帶民氣強悍賊得之則爲寇兵我收之可成勁旅張其翰楊元勳曾經屢次辦團接仗爲地方所信服應及此時鼓勵紳民召致健勇雖未必藉以成

功庶使平民不致盡流爲盜亦令各路兵勇聲氣聯絡
總期遏賊於境外不至深入構禍邊防或稍有可恃謹
將辦理緣由會同署廣東巡撫臣郭嵩燾合詞附片密
陳伏乞

聖鑒謹

奏

奏稿卷十二

七

擒獲菱角塘首逆北江一路肅清摺

同治三年四月初一日

奏爲官軍勦捕菱角塘一帶土匪生擒逆首北江一路肅清恭摺由驛馳陳仰祈

聖鑒事竊英德巨匪鄧二尺七等在三山等處糾衆肆

擾先經

臣

派令統帶楚勇之福建按察使張運蘭督軍

勦辦擣穴擒渠於本年正月十七日由驛

奏報在案

臣

以北江之英德陽山一帶地勢險阻山深

箐密素爲逋逃淵藪鄧二尺七雖已就戮此外伏莽尙多若不乘時搜捕淨盡誠恐官兵一撤餘燼復然當經

札飭張運蘭派撥弁勇協同陽山英德乳源翁源各縣

奏稿卷十二

三

逐處搜查張運蘭卽移紮青蓮墟督同各地方官辦理

善後事宜先後將鄧二尺七餘黨著名要匪廖觀養曾

卽受吳進邦鄧亞倫阮亞養黃伸祐黃亞保等拏獲復

查悉英德陽山乳源三縣交界之菱角塘石街蔣家洞

一帶多有積年凶慝在彼嘯聚爲首之馮九指及盧亞

隆盧亞養劉亞奇均係鄧二尺七死黨並皆受陳金甌

僞職凶狡異常恃其山谿僻險官兵不能深入遂成負

固之形張運蘭馳抵該處見其難於用兵急攻隨購覓

綫人作爲嚮導派令總兵易榮華副將賀國楨等選帶

敢死之士親詣山內捕獲匪黨盧陳貴盧水保蔡蒂養

等十餘名而首逆馮九指盧亞隆盧亞養盧亞朗劉亞奇等已逃入深洞中屢搜未獲張運蘭念力攻不如計取遂麾兵退出山外一面接見紳民示若不復措意者然不數日探知馮九指等果潛回鄉閒張運蘭密諭綫目先將劉亞奇一名誘擒卽於二月二十六日三更時候與總兵易榮華副將賀國楨譚邦連遊擊譚發律等分督所部偃旗息鼓馳至石街地方將馮九指村寨圍住遣令綫人馮聲鑾馮上秀等進村傳諭鄉民如將馮九指捆獻其餘被逼從賊者均予寬宥否則悉數駢誅該村民不意官兵猝至倉皇失措無敢抗拒者移時馮

奏稿卷十二

三

聲鑾等將首逆馮九指捆縛獻出並獲要犯盧亞隆盧亞養二名復於附近深洞村田心村後山洞擒獲從逆打仗之悍賊盧灶養盧單邊灶蔡第養盧亞元等二十餘名匪黨畧盡惟盧亞朗盧亞保率其死黨數十人攜帶糧食逃入老虎徑之水仙巖洞內此洞繚曲深邃不能進兵張運蘭分派各營弁勇於出入路徑層層堵截日夕輪伺該匪匿跡深藏絕無動靜復募死士絕入傳諭責令縛獻要逆餘俱不殺而盧亞朗盧亞保以前此鄧二尺七出洞被擒視爲覆轍力抑其黨甘死洞內不出張運蘭忿甚隨傳令各營多備柴薪火具於巖洞兩

頭盡力熏灼閱五六日之久洞中寂然無聲諒亦無有生者乃搬運大石將洞門填塞三月初二日拔營馳回青蓮將要逆馮九指劉亞奇盧亞隆盧亞養四名錄供委員解省審辦餘匪悉在軍前正法等情稟報前來除將各犯發司訊明處決外伏查該逆馮九指等皆與鄧二尺七狼狼相依歸附陳金缸爲僞官分踞山砦擾害地方兵至則負隅抗拒兵退則出而肆虐十餘年來根深蒂固營縣文武各官力不能制實亦無可如何此次臬司張運蘭督兵圍捕設計兜拏使該逆等及時就擒不致損傷士卒辦理實屬得法現在北江英德陽山一

奏稿卷十二

三

路大致肅清臣正擬飭張運蘭駐師韶州聽候調遣適聞金陵逆賊李世賢前隊之花旗股匪有回竄粵東之意南雄州爲江西入粵首站最爲扼要當卽札調該司督率所部馳往駐紮防堵以備不虞此外翁源英德交界之隴口鄉尙有零星土匪數名早經逃匿尙不值重煩兵力惟有嚴飭地方文武實力搜查務期全獲究辦毋任漏網所有疊次勦捕在事出力官紳兵勇可否容臣擇尤酌保之處出自

天恩謹會同署廣東巡撫臣郭嵩燾合詞恭摺由驛馳陳伏乞

皇太后

皇上聖鑒訓示謹

奏

奏稿卷十二

三

遵 旨飭張運蘭拔營赴閩摺 同治三年五月十五日

奏爲遵

旨檄飭福建臬司張運蘭拔營赴閩迎勦並分調官軍防堵連界各處恭摺由驛馳陳仰祈

聖鑒事竊 臣前據探報金陵逆賊僞侍王李世賢大股

分竄江西福建各處當經檄飭帶勇在粵之福建臬司張運蘭率領所部湘勇三千人駐紮南雄州探明緩急情形相機辦理兼顧韶南一帶邊防如賊已占踞城邑則當越境助勦毋使滋蔓並令四川候補知府劉德謙管帶信字營楚勇移駐樂昌相爲犄角仍飭添募楚勇

奏稿卷十二

三

三千人以成勁旅嗣准閩浙督 臣左宗棠來咨飭令張運蘭挑選所部二三千人馳赴福建臬司本任當將該司一軍不能輕離粵境情形於本年三月初七日具

奏是月二十八日奉

上諭張運蘭旣不能卽赴任而閩省防勦亟須預爲籌布著左宗棠徐宗幹催督曾元福內渡之軍迅移得勝勁旅回顧腹區以資調遣由江竄閩賊勢如何並著隨時馳奏張運蘭之軍馳往英德於該處零星股匪自當迅速掃蕩劉德謙楚勇卽准其添募與爲犄角速將各處伏匪翦除嚴布粵東毘連江閩邊境以防逆匪回竄

其南韶與嘉潮兩路均屬不可大意而嘉潮民俗尤悍逆匪由閩之邵汀一路奔趨路尤徑捷且恐其黨與散歸者於該處爲多張運蘭如移紮此路相機堵勦於閩省較爲聲息易通卽以劉德謙新募楚勇專防南韶亦覺便捷應卽如何辦理之處著毛鴻賓等妥籌辦理方耀所部駐紮鎮平以顧嘉應一路是否合宜並著毛鴻賓妥籌調度毋稍疏虞等因欽此當經恭錄轉行欽遵查照嗣據張運蘭稟報於四月初三日全軍馳抵南雄探得前踞江西建昌府屬新城之賊已敗竄福建之建甯甯化二縣復竄江西廣昌縣屬之尖峯白水寨欲與

奏稿卷十二

三

前踞南豐之賊爲援嗣南豐股匪經江西官軍擊敗由新城東竄福建延平府屬之將樂縣又竄至邵武府屬之建甯汀州府屬之清流歸化連城等縣其江西廣昌一股始則回竄福建甯化繼又從瑞金石城西竄甯都州而南豐分股亦有闖至瑞石二縣境內者又據潮州鎮道府稟報探聞閩省建甯甯化二縣俱已收復惟賊蹤飄忽無常往來靡定現在邵汀各屬俱有兵練防堵惟連城永定一帶較爲空虛民心不無驚恐等情並據東北兩路文武查探稟報大畧相同臣查江閩賊匪多在邵武汀州二府及甯都州之境與粵省東北一帶處

處毘連潮惠嘉南四府州邊防數百里統計調防四處
兵勇八千餘人兵力實形單薄然以閩粵相較則粵東
祇守邊防而閩省則賊氛已熾情形更爲喫緊自應迅
圖撲滅以免蔓延臣與署撫臣郭嵩燾連日熟商本擬
檄飭張運蘭拔營前往東路迎勦惟南雄地處江西之
衝接替防守必須選派得人刻下雖有副將沈玉遂管
帶楚勇駐守樂昌而知府劉德謙招募楚勇來粵尙需
時日該處兵力單薄難以獨當一面正在計議閒適於
四月二十二日承准議政王軍機大臣字寄四月初二
日奉

奏稿卷十二

三

上諭現在由江竄閩之賊日多如由邵武汀州一路奔
趨閩省官軍恐難堵截著毛鴻賓飭令張運蘭仍卽速
回本任帶領所部迎頭堵勦使賊之竄閩者不得肆行
奔突卽所以保完粵境毋許固執力爭過存畛域之見
並著將知府劉德謙添募楚勇酌定如何調撥預防賊
由江境竄粵之路粵東勦除各處餘匪兵力如尙不敷
須行另募道員唐啟蔭現在何處該員是否得力能否
籌給勇資飭令添募西勇及楚邊各勇以資調遣之處
著毛鴻賓郭嵩燾酌量辦理又五月初一日復奉

上諭張運蘭前爲毛鴻賓奏留粵省嗣經寄諭仍飭赴

聞現在閩邊喫重著毛鴻賓仍飭張運蘭速回本任迅
統所部卽赴建甯與曾玉明妥籌會擊不准堅留瀆請
輾轉耽延貽誤大局其粵東毘連江閩各邊並著毛鴻
賓郭嵩燾嚴密布置預籌分扼以杜窺伺之路等因欽
此仰見

聖主籌備邊防無微不燭下懷欽佩莫可名言

臣查臬

司張運蘭上年由

臣

奏派募勇成軍隨同來粵勦平李

復猷巨股連破鄧二尺七並搜捕各路伏莽實爲粵中
緩急足恃之軍今江皖逆匪上竄該匪分合無常去來

飄忽近日接閱各處探報福建汀州頗爲震動武平一

秦稿卷十二

七

路更覺空虛難以恃爲屏蔽是目下情形以東路爲尤
急自應欽遵

諭旨飭令張運蘭卽行馳赴嘉應察探賊蹤所在轉戰
而前其南雄一路查有廣東補用道唐啟蔭前在高州
及廣西容岑等處辦理勦撫諸稱得力三月閒回東銷
差察看該員明幹樸誠精神沈細從軍數載明於戰守
機宜第飭令回西募勇不惟庫空如洗經費難籌且曠
日持久緩不濟急現已飭委該道率領都司銜鄭紹忠
帶勇一千五百名先赴防所擇要堵禦仍令該員在於
廣西舊部親軍挑選三四百名來東調遣並委因公在

省之廣西新太協副將潘其泰隨同唐啟蔭前往幫辦
仍俟劉德謙募齊楚勇到粵再行酌量分別調撥其張
運蘭一軍開幕至今纔及八月而欠餉已積至四月之
久越境遠征急應籌款清釐臣一面札飭唐啟蔭前往
接防一面札飭軍需局趕緊籌畫期使交替啟行不至
遲延至署三江協副將方耀一軍前經飭令駐紮鎮平
以顧嘉應嗣因所部兵勇多係潮人而大埔一縣與閩
省永定上杭帶水可通距汀州不過三四百里應改調
方耀移紮大埔惟該營積欠口糧甚鉅分限清釐極費
周章致未能迅速赴防因調署惠州協副將施溥挑選
營兵一千四百名前往鎮平復飭潮州鎮道府選募兵
勇八百名派委都司楊清臣守備許步雲等管帶在於
大埔鎮平一帶樹之先聲並委虎門屯防同知吳贊誠
馳往嘉應督同地方官紳辦理團防臣才術短淺地形
賊勢詳加考究竭力籌防總期遏賊境外使不至深入
爲害以仰副

聖主綏靜邊陲之至意謹會同署廣東巡撫臣郭嵩燾

由驛馳

奏伏乞

皇太后

皇上聖鑒訓示謹
奏

奏稿卷十二

三

請優卹總兵文恆久片

同治三年五月十五日

再據福建按察使張運蘭稟稱提督銜湖南補用總兵文恆久湖南長沙府湘鄉縣人咸豐三年入老湘營疊次隨同打仗屢受重傷攻克各府州縣城池勇敢過人戰功卓著由千把總洊擢至副將總兵同治元年帶勇至貴州克復天柱漢寨二年又往益陽辰州等府縣勦辦各逆不避艱辛經湖南巡撫惲世臨保奏

賞加勇號尚未接准部覆上年七月奉調來粵勦辦信宜陳金缸股匪適陳逆授首而石逆餘黨李復猷竄擾粵境復奉札調前往勦辦將首要各犯擒獲正法餘匪

奏稿卷十二

三

分別勦撫該總兵晝夜勤勞心力交瘁繼又移師勦辦英德三山鶴嘴鄧二尺七賊巢連日督兵進攻將各處賊巢平燬上年十二月二十一日該總兵親執大旗直搗鄧逆老巢將守濠悍賊盡斬詎意逆巢槍礮四出該總兵右邊肩背受傷流血及屢各勇趕上救回彼時已不省人事當卽延醫調治無如礮子落腰按之其大如丸挖取不出數日後始進水米嗣是偶能起坐舉動須人扶持礮子時上時下皮肉腫潰本年春閒舊傷盡發肩背腫潰更甚一身幾無完膚延至四月初九日殞命該總兵平日最得士心閭營爲之流涕現在因傷亡故

稟懇據情奏請優卹該故員臨終之日自恨未得仰報朝廷並有此生不能顯揚其親之語請奏懇

賞給伊父母正一品封典以慰忠魂而勵士氣并聲明該總兵現有一子在籍肄業等情前來臣查總兵文恆久帶勇勦匪不避艱險十餘年來未嘗一日休息茲因在粵勦辦逆賊身受重傷殞命深堪憫惻查該員因攻勦英德三山鶴嘴鄧逆一案仰蒙

皇上賞加提督銜可否籲懇

天恩將該總兵文恆久照一品官軍營立功後因傷亡故例從優賜卹並

奏稿卷十二

五

賞加該員父母正一品封典之處出自

逾格鴻慈臣

謹會同署廣東巡撫臣

郭嵩燾合詞附片

具

奏伏乞

聖鑒訓示謹

奏

陸續拏獲洋面盜匪片

同治三年五月十五日

再粵東地方濱海劫盜風行近洋高瀾一帶素爲盜藪
經_臣咨商水師提_臣溫賢選派幹練將弁督率巡洋舟
師添雇拖船前往圍捕又東莞縣屬之板頭村新安縣
屬之岡邊村均有匪徒私造長龍艇數十號出入海洋
攔劫行船又經飭委前任潮州府知府海廷琛等會同
水師遊擊黃廷彪等前往查辦已起獲長龍匪艇十餘
隻惟各犯尙多在逃未獲當飭購綫督兵嚴行躡緝於
同治三年正月十七日具

奏承准議政王軍機大臣字寄二月十九日奉

奏稿卷十二

早

旨知道了陽春東莞各屬土匪及高瀾洋面盜匪均著
分別嚴飭認真緝拏悉數弋獲以期地方海洋兩臻靜
謐欽此當經恭錄轉行欽遵在案查陽春客匪髮賊業
經官軍擊敗逃竄新興現在檄飭署羅定協副將卓興
署清遠營守備侯勉忠拔營趕往會勦並委候補知府
史樸攜帶示諭前往相機招撫雖經該匪等呈遞稟詞
申辯冤枉而土逆戴梓潰等迄未捆送尙無真心悔罪
之意仍須重創示懲免留後禍第客匪尙十餘萬人新
興東安一帶山路重複四處蔓延又以久雨泥淖不能
進兵疊經_臣飭催速勦仍及時體察情形酌量辦理至

高瀾盜匪節經嚴飭水師員弁前往查拏並經水師提
臣溫賢捐資雇船募勇督飭各協營將備出洋查辦本
年春間據署水師提標左營遊擊衛明英稟報督同守
備楊秀華等雇駕挖船會同香山舟師先後在高瀾橫
洲三竈口等處洋面追捕賊船礮斃賊匪數十名生擒
何元得等八名續獲溫莫修等九名並賊船礮位又於
四月間據護香山協副將湯騏照署水師提標左營遊
擊衛明英統帶大小挖船在浪白濬乾霧涌等處焚擊
賊匪頭艙船一隻斃賊百餘名拏獲盜首張容得四及
賊夥共三十四名起出被擄事主工伴三名奪獲賊船

奏稿卷十二

聖

九隻大礮十一位又千總楊衛清等在芒洲洋面擒獲
賊匪林德權等八名賊船一隻又據水師提標右營遊
擊黃廷彪等稟報千總吳迪文黃廷耀在三洲塘洋面
遇見賊船三隻督率舟師追至大浪環洋面焚燬賊船
一隻各賊被燒落水淹死無數生擒賊匪陳志滿等七
名並獲賊船二隻及礮械等件並據前任潮州府海廷
琛等稟報查辦岡邊等鄉賊匪會同營縣先後拏獲行
劫盜犯鄧亞羊等三十四名又蕭亞合等五名洋匪鄧
亞有等二名又迭據新會營參將尹達章等稟報自二
月至四月內節次在西海一帶拏獲賊匪黃亞昌吳暉

松張寶仔梁亞乞李得偉等三十七名以上各犯均已
押解到省飭發廣州府審辦伏查高瀾洋匪招集黨與
駕船出洋並在香港山順德新會各處劫擄打單商旅深
受其害今經舟師節次前往圍捕格斃及生擒首夥多
名並獲賊船礮械多件足以寒賊膽而快人心惟該處
港汊紛歧一時尙未能殲除淨盡岡邊等鄉賊匪雖經
海廷琛等前往圍捕獲解三十餘名逸犯尙多在逃若
不悉數就擒終爲海洋之患臣已嚴飭各文武員弁設
法圍拏並懸賞購緝務將外洋內河各匪悉數擒獲解
辦以安商旅而靖地方一面檄飭廣州府將各案人犯
審擬解勘到日卽行分別正法彙案奏報現當嚴辦盜
匪之際各員弁或遠涉重洋或深入險阻多方購捕實
屬著有微勞可否仰懇

聖慈准臣擇尤酌保以資鼓舞之處出自逾格

天恩謹會同署廣東巡撫臣郭嵩燾水師提督臣溫賢

合詞附片具陳伏乞

聖鑒訓示謹

奏

瀝陳度支艱窘請緩解協撥各餉摺

同治三年六月初十日

奏爲瀝陳廣東省度支艱窘情形請將協撥各款分別

緩解恭摺

奏祈

聖鑒事竊

臣

等承准議政王軍機大臣字寄同治三年

五月初一日奉

上諭徐宗幹奏請飭催廣東等省欠餉一摺據稱廣東欠解三十一萬九千三百餘兩另有應解按月添撥督臣援浙軍餉銀十萬兩等語逆匪由江入閩軍情甚形喫緊著毛鴻賓郭嵩燾迅將欠解前項閩餉趕緊籌措

奏稿卷十二

聖

派委委員解閩以資接濟並著將應解添撥援浙軍營按月協餉銀十萬兩一併陸續籌解毋再遲延前諭令毛鴻賓郭嵩燾檄令張運蘭由潮州入閩勦賊現在閩省賊勢甚重兵力不敷勦辦亟須添撥勁旅藉資埽蕩毛鴻賓郭嵩燾凜遵迭次諭旨飛催張運蘭督率所部星馳赴閩協勦儻再任意奏留或任令延不起程致令閩省賊匪蔓延腹地掣動全局恐毛鴻賓郭嵩燾不能當此重咎也等因欽此

臣

等跪誦之餘莫名悚惕當卽咨行欽遵查照伏查粵省舊欠閩省協餉銀三十餘萬

兩經前任福建撫

臣

瑞璜於同治元年正月間將洋商

資本截借銀二十萬兩由粵海關兌完洋稅應卽在粵省未解閩餉項下照數劃抵是舊欠已無三十餘萬之多至前閩浙督臣慶端帶兵援浙奏令粵東續撥協餉銀二十萬兩旋又奏請按月添撥銀十萬兩並無款項可指尤屬憑空結撰任意添撥之數迨升任閩浙總督前廣東撫臣耆齡由粵赴浙援勦卽在粵省各庫盡情撥括勉湊銀二十萬兩而浙江藩司蔣益澧由廣西帶勇赴浙迂道來東迫索勇糧行資銀十二萬兩守候數月之久庫款不足從而貸借並撥給倉鹽二萬包運赴湖南銷售溢出鹽價盈餘銀四萬餘兩均由蔣益澧帶

奏稿卷十二

四

往浙省備支軍餉統計前項銀三十餘萬兩亦應分晰截算作爲粵省撥兌援浙餉項臣等現飭藩運二司暨軍需總局司道逐一查明列冊分咨核辦以清款目因思閩粵兩省海關鹽課地丁支撥軍餉情形大畧相同而其大宗在海洋貿易向年廣東以兼通湖廣江西攬數省之利故爲繁盛福建南界廣東北界江浙百貨流通不出省境故爲儉約近年內江通商廣東之利源已塞而福建之建甯汀漳延泉等府產茶極旺徑行販運出洋洋藥銷行向以福建爲第一口岸以此二者之利閩關課稅數倍從前是廣東由豐而已至於約福建由

約而漸趨於豐情事較然共知共見自咸豐三四年以來福建用兵閒有止息廣東寇亂繁興從無止息之時其艱難又更甚於福建若一指撥廣東協餉而卽據爲陳欠按年增加責成供給在臣等原不敢區分畛域然情見勢絀亦斷無自顧不遑而反舍己從人之理現在江西竄匪擾及福建建甯甯化等縣臣等檄飭張運蘭一軍馳援福建而積欠之餉與起程行裝並須預給一月糧餉籌放至五六萬兩已早窮於搜索閩省委員試用同知金治禮採買洋火藥一千餘觔所需價值亦已飭由糧道庫籌給廣東協濟閩省之力止於此數臣等

奏稿卷十二

聖

因查廣東艱乏情形爲事勢所固然而無能見諒於人敬爲我

皇上縷悉陳之從前

國家繁盛之時蘇廣並稱江蘇爲財賦之原故解款甚鉅廣東則粵海關利擅華洋夙稱殷富所徵關稅除例解內務府廣儲司公用等銀三十餘萬部庫數十萬外餘銀存庫緩急皆可支撥至藩庫額徵錢糧等銀百餘萬以之全充本地兵餉等項不敷之數則有運庫鹽課銀六十餘萬每年由部撥濟本省充用總在五十萬兩左右此外別無格外撥款是以各庫常見充盈廣東之

富故與蘇省並擅名於天下迨道光二十一年閒外洋人初次構釁海防經費耗散數千萬兩各庫遂致匱乏及咸豐初年紅匪滋事疊陷郡縣旋復續辦洋務地方殘破徵收漸絀而支用轉繁愈形竭蹶然尚有捐輸之款有商賈抽釐之款有溢坦變價之款動輒百數十萬藉資挹注故雖所入不償所出然勉強支撐亦尚不至於窮困至於近年則不然關稅鹽課提充京餉一切例撥之款半成具文無從撥解如海關應解藩庫正額銅斤水腳糧道庫普濟堂等銀九萬餘兩爲數無多積欠至三四年部撥鹽課積欠至二百餘萬僅地丁一款供

奏稿卷十二

四六

藩庫支放而又有蠲緩有民欠惠潮各屬徵收日形短絀重以信宜之變肇慶土客之擾蹂躪十餘縣不能開徵統計歲徵地丁不過六七成以此六七成地丁供常年支放之款猶不及其半而又添募勇丁至數萬人支應浩繁近復因江浙竄匪蔓延江西福建籌備邊防千餘里東北兩江添造礮船日不暇給祇此歲入之經費祇此一省之民力需用日多籌畫日絀所稍恃以接濟者捐輸耳而捐輸之弊又有二難廣東向辦捐輸歷派之意多而勸導之情少嗣遂相援爲例省城派之州縣州縣派之各鄉官紳因緣爲利報捐之數多耗於中飽

又當正氣銷沮之時一二明理者勉強在事亦復多方推諉其肯任事者經手而或多侵牟失職而又生謠謗體察情形訖無善策則得人之難也廣東吏治不修爲時已久官民積相猜疑民情之怙其私利各直省皆然所恃勸導之適宜耳廣東一會之花消可至巨萬一席之豪舉動輒數千而釐金捐輸獨多阻滯無他官民之語言不通而情易隔而在事者之勸導先無以自喻其心故也乃至沒其籌餉之苦衷而或訾爲罔民之裨政奔走異地以求避倚附外人以相持則取信之難也坐是二難加以迭次籌辦之勢羅掘四窮之時無能望有

奏稿卷十二

四七

裨濟至於溢坦變價業經完竣釐金酌留三成勉強分潤增加無幾固更無措手之地矣_臣等日夜籌思京餉不能不如數報解江南釐金不能不按成協濟少或愆期已覺負咎常深而於本省艱乏情形尤有所甚懼者總其大患約有三端廣東綠營額兵計數幾至七萬而無一營可用之兵承平日久疲弱旣多加以額餉遞年積欠至三十月有奇責成教練竟亦窮於立言_臣等頃咨商水陸提_臣於附省各營及肇慶惠州距省畧近之營每額兵七八百人內挑選訓練二三百名以資調遣漸次求練兵之實省募勇之煩而前挑選惠州提協兩

標之兵出防鎮平各兵已因緣索餉幾至鼓譟近日南韶鎮標又聞有索餉之揭帖督之出戰則爲罷兵俾之訓練又成驕卒此七萬餘人之額兵每歲籌放三四成之餉而不可得何能久與相持此其大患一也廣東舊募之勇營數旣繁營制亦疏虛報虛支其弊莫可究詰臣等於克復信宜後遣散至十餘營按其欠數多寡分別清釐或予現銀或立限票爲數已復不貲而卓興方耀兩大營積欠皆至數十萬昨調方耀一軍馳赴嘉應防堵駐紮省城兩月有餘將欠款一一開列計八十餘萬兩臣等飭總局司道逐細句稽就稟報有據者核實

奏稿卷十二

四

結算其餘概行刪除尙應給銀四十餘萬兩當經議給現銀十二萬兩餘欠分限帶還以資周轉該營勇丁六千八百餘名馬隊夫役在外向因積欠過鉅不敢議裁以至尾大不掉如此臣等此次用恩用威剛柔交濟勒令挑留精壯三千名餘人撤散歸農十年積因爲之一舒然舊逋甫結新欠又積展轉騰挪智術俱窮卓興一軍現在肇慶勦辦客匪欠領口糧亦數十萬尙未知從何籌放欲勉強敷衍則一有徵調輒借欠餉爲辭多方阻抗欲遂分別裁撤又無從得此巨款旣苦籌畫之已窮遂至補苴之無術此其大患二也廣東盜賊風行有

出洋之巨艇有內河之快艇有各村莊之長龍艇皆船
堅礮利聚眾橫行每出行劫又有包庇匪類爲飯主之
紳士有窩匪之村莊歷來辦盜皆先籌備經費經費愈
多則著名之大盜亦可以設法捕除非是則人皆樂縱
遣之以邀厚利亦積習然也而遂因循以至寇盜之充
斥_臣等懲治盜賊無稍寬假而欲整飭水師添造船隻
窮究盜蹤之出入圍剿窩匪之村莊經費浩繁動苦無
措現在各直省無不患貧獨廣東有貧之實而仍富之
名由於積慣浮靡之習眩人耳目故也又民間嗜利輕
生以重利驅市人而使之戰皆能冒死邀功一貧則百
計俱廢今盜賊日積而日多經費日籌而日絀不必外
寇之至卽內地伏莽辦理已形棘手此其大患三也就
廣東現在情形論之民力之凋殘已甚而地方究屬完
全利源之疏鑿已窮而商賈猶能周轉若及時從長籌
畫尙足自強無如歷年之積弊廣收博用而虧負太深
目前之補苴百孔千瘡而支持之術如去冬奉准部咨
飭將鹽課地丁提撥京餉之款限於端節以前提解一
半經_臣等督催藩運兩司次第報解皆從銀號挪墊按
卯催收課銀陸續歸還初次報解之款距今三月有餘
始經結算清楚誠恐東北兩江防堵尙須添募兵勇一

切經費正不知於何籌措所有各省協餉亟應一例停止至應解本年京餉藩運兩庫已起解及半其海關稅項短解尚多已疊催該監督趕緊籌畫其藩運二庫年內應解之一半計惟竭力督催以冀陸續解京或不致有延誤臣等受

恩深重具有天良但使少可措手斷不敢將艱苦情狀上瀆

聖聽惟是廣東積弊由於粉飾過甚臣等若再隱忍不言則其患將不可思議此時若暫緩徵求俾地方氣力少舒尚可徐圖補救此又臣等愚慮體察大勢情形不

敢不縷陳之

奏稿卷十二

五

聖主之前者也至張運蘭所部湘勇臣鴻賓前在湖南募集成軍借支湖南庫項八萬餘兩原議到粵卽行解還延今半年有餘未能絲毫歸款張運蘭抵粵後勦辦巨匪疊著戰功其勇糧亦不能按期支放又已積欠銀數萬兩昨據張運蘭稟報定於五月十八日起程由江西陸路取道赴閩嗣又稟稱所部湘勇探知福建艱苦兼之路途遙遠山路崎嶇皆不願往多有散回原籍及在邊界屯聚候領欠餉者臣等一面飭張運蘭察看各散勇是否尚可招集以期迅速啟行一面趕緊籌發餉

銀俾得有所藉以聯一軍之心斷不敢私此一軍爲留
粵防堵之計卽張運蘭素性勇往亦斷無聞警逗遛遷
延不進之理應俟其查明各勇散駐邊界情形再行據
實陳奏所有粵省度支艱窘力難協濟閩餉併現催張
運蘭一軍赴閩各緣由謹合詞恭摺附驛馳陳伏乞

皇太后

皇上聖鑒訓示謹

奏

奏稿卷十二

五



